

南唐書序

天曆政元。余待罪中執法。監察御史王主敬謂余曰。公向在南臺。蓋嘗命郡士戚光纂輯金陵志。始訪得南唐書。其於文獻遺闕。大有所考證。裨助良多。且爲之音釋焉。因屬博士程熟等。就加校訂。鐫板與諸史並行之。越明年。余得告。還金陵。書適就。光來請序。按南唐本紀。李昇系出憲宗四世。間關困阨。纔有江淮之地。僅餘三十年。卒不復振。而宋滅之。雖爲國稱小。觀其文物。當時諸國。莫與之並。其賢才碩輔。固不逮蜀漢武侯。而張延翰。劉仁贍。潘佐。韓熙載。孫忌徐鐸之徒。文武才業。忠節聲華。炳耀一時。有不可揜。矧其間政化得失。興衰治亂之跡。有可爲世鑒戒者。尤不可泯也。竊謂唐末契丹雄盛。虎視中原。晉漢之君。以臣子事之。惟謹。願乃獨拳拳於江淮小國。聘使不絕。嘗獻寶貽并牟馬千計。高麗亦歲貢方物。竟者久服唐之恩信。尊唐餘風。以唐爲猶未亡也。邪。宋承五季。屬統。目爲僭僞。故其國亡。而史錄散佚不彰。然則馬元康胡恢等。迭有所述。今復罕見。至山陰陸游著成此書。最號有法。傳者亦寡。後世有能秉春秋直筆。究明綱目統緒之旨者。或有所考而辯之。姑識其端。以俟君子。余前忝史館。朝廷嘗議修宋遠金三史而未暇。他日太史氏復申前議。必將有取於是書焉。集賢大學士奎章閣大學士光祿大夫知經筵事趙世延序。

南唐書目錄

卷一

烈祖本紀

一

卷二

元宗本紀

五

卷三

後主本紀

一一

卷四

宋齊丘列傳

一五

卷五

周徐查邊列傳

一八

卷六

周柴何王張馬游刁列傳

二一

卷七

徐高鍾常史沈三陳江毛列傳

二六

卷八

三徐三五二朱胡申屠喬睦列傳

三一

卷九

劉高盧陳李廖列傳

三五

卷十

張李皇甫江歐列傳

四〇

卷十一

馮溪廖彭列傳

四四

卷十二

孟陳韓朱列傳

四八

卷十三

劉潘李嚴張龔列傳

五一

卷十四

郭張林盧崩二陳列傳

五六

卷十五

周鄭李三劉江汪郭伍蕭李盧朱王魏列傳

六〇

卷十六

后妃諸王列傳

六五

卷十七

雜藝方士節義列傳

七一

卷十八

浮屠契丹高麗列傳

七四

南唐書

卷一

烈祖本紀第一

烈祖光文肅武孝高皇帝。名昇。字正倫。小字彭奴。徐州人。姓李氏。唐憲宗第八子建王恪之玄孫。恪生超。超生志。仕爲徐州判司。卒官。因家焉。志生榮。榮性謹厚。喜從浮屠遊。多晦跡精舍。時號李道者。帝以光啓四年十二月二日生於彭城。大歲而孤。遇亂。伯父球攜帝及母劉氏。避地淮泗。至濠州。乾寧二年。淮南節度使楊行密見而奇之。養以爲子。行密長子溆惡帝。不以爲兄弟。行密乃與大將軍徐溫曰。是兒狀貌非常。吾度溆終不能容。故以乞汝。遂冒姓徐氏。名知誥。帝事溫盡子道。溫妻李氏。以其同姓。鞠養甚至。及長。身七尺。方額隆準。脩上短下。語聲如鐘。精采鑠人。常緩步。而從者疾行莫能及。溫有疾。與其婦晨夜侍旁不去。溫益愛之。行密亦謂溫曰。知誥雋傑。諸將子皆不逮也。天祐六年六月。自元從指揮使遷昇州防遏使。兼樓船軍使。治戰艦於昇州。七年五月。授昇州副使。知州事。九年。副柴再用平宣州。以功遷昇州刺史。時江淮初定。守令皆武夫。專事軍旅。帝獨褒廉吏。課農桑。求遺書。招延四方士大夫。傾身下之。雖以節儉自勵。而輕財好施。無所愛吝。以宋齊丘。王令諤。王翊。主諭議。會禹。張洽。孫簡。徐融。爲賓客。馬仁裕。周宗。曹恻。爲親吏。十一年。加檢校司徒。始城昇州。十四年五月。城成。溫來觀。喜其制度壯麗。徙治焉。而以帝爲檢校太保。潤州團練使。帝本意在宣州。不悅。時溫子知訓以內外馬步都軍副使。專制楊氏。驕淫失衆。宋齊丘納說曰。知訓旦暮且敗。是行天所贊也。十五年。朱瑾殺知訓。馬仁裕自蒜山渡。馳告帝。帝即日帥師入廣陵定亂。遂代知訓爲淮南節度行軍副使。內外馬步都軍副使。勤儉寬簡。盡反知訓之政。上下悅服。吳王建國。以帝爲左僕射。參政事。國人謂之政事僕射。乘剡亂之後。曾未期歲。紀綱憲度。榮然並舉。溫雖遙執國政。而人情頗已歸屬於帝。有徐玠者。事溫。爲金陵行軍司馬。工揣摩捭闔。密說溫曰。居中輔政。豈宜假之它姓。請更用嫡子知詢。帝刺知皇恐。表乞罷政事。出鎮江西。表未上。而溫疾亟。遂止。溫卒。知詢嗣爲金陵節度使。諸道副都統。數與帝爭權。帝乃使人誘之來朝。留爲左統軍。悉奪其兵。而帝以太尉中書令出鎮金陵。如溫故事。吳命

帝開大元帥府。置僚屬。進封齊王。用天子制度。改名誥。

昇元元年冬十月。吳帝禪位於我。甲申。即皇帝位。改吳天祚二年爲昇元元年。國號齊。以十二月二日爲仁壽節。尊吳帝爲高尙思。立弘古讓皇帝。上冊稱受禪老臣誥。追尊考溫爲太祖武皇帝。丙申。以平章事張延翰爲右僕射。兼門下侍郎。同平章事。門下侍郎張居誥。中書侍郎李建勳。皆爲同平章事。以建康爲西都。廣陵爲東都。改尙書省爲尙書都省。東都尙書省爲留守院。丙戌。改齊明門爲朝元門。丁亥。封弟知鑒爲江王。知誥爲饒王。戊子。降吳太子璉爲弘農郡公。辛卯。降吳建安王珙。江夏王璘等十一人爵一等。而加官增戶邑。詔獄訟未經本處論決者。毋得詣闕訴。乙未。降吳公主爲國君。甲午。立王后宋氏爲皇后。丙申。封女弟杞國君爲廣德長公主。庚子。遣使如漢。閩吳越荆南告即位。辛丑。追封吳歷陽公蒙爲臨川王。諡曰靈。以禮改葬。戊申。封子景通爲吳王。諸道副元帥。判六軍諸衛事。十一月庚戌朔。改東都舊第爲崇德宮。癸丑。改承宣院爲宣徽院。丙辰。追冊故妃魏國君楊氏爲順妃。丁巳。追封長子景遷爲高平郡王。長女爲豐城公主。改辭狀司爲清訟院。立姪景邁爲晉陵郡公。景遜爲上饒郡公。景逸爲桂陽郡公。景逸爲平陽郡公。封女五人爲盛唐。太和。永興。建昌。玉山公主。戊午。立子景遂爲吉王。景達爲壽陽郡公。以景遂爲東都留守。江都尹赴東都。己未。陞東都海陵縣爲泰州。割鹽城泰興。如皋。興化縣屬焉。丁卯。高從誨表請置郎建康。從之。己巳。吳越王使將軍袁紹來賀即位。乙亥。追封故高平王景遷妃吳上饒公主爲燕國君。諡貞莊。十二月庚寅。上太祖武皇帝陵曰定陵。追尊高祖以下皆爲公王。而稱宗。配皆稱國君及妃。墓皆稱陵。惟武皇帝之配李氏曰明德皇后。丙午。有星孛北方。

昇元二年春正月己酉朔。日有食之。避殿。停朝賀。甲子。高從誨使龐守規來賀即位。甲戌。詔臣僚三品以上追贈父母。將相贈三世。二月壬戌。閩使內客省使朱文進來賀即位。夏五月。讓皇漢請徙居。南平王李德誠等亦引漢隋故事。有請。戊午。改潤州州治爲丹陽宮。以平章事李建勳充迎奉讓皇使。己未。漢使集賢殿學士鄒禹謨來賀即位。甲寅。徙讓皇居丹陽宮。丁卯。廣濟倉災。焚米二十萬石。作渾天儀。六月庚辰。月入太微西華門。犯右執法。辛巳。犯東垣上相。甲申。陞池州爲康化軍。是月。高麗使正朝廣評侍郎柳勳律來朝貢。秋七月壬申。以左丞相宋齊丘爲平章事。八月戊寅。陞洪州清江鎮爲清江縣。不隸州。丁亥。契丹使梅里祿盧古來聘。冬十月丙子。立太學。命

剛定禮樂。癸未。新羅使來朝貢。壬辰。命吳王璟勒步騎八萬。講武銅甌橋。十二月辛丑。讓皇祖。詔不視朝二十七日。帝率百官素服。舉哀是歲。徙吳王璟爲齊王。

昇元三年。春正月庚戌。江王知證。饒王知諱。表請帝復姓李氏。不許。癸亥。右丞相齊丘。平章事居詠。建勳。樞密使同平章事宗等。表請復姓。甲子。御札詳議復姓。乙丑。齊丘等議。宜如所請。從之。丙寅至壬申。齊王璟等三上尊號。曰應乾紹聖文武孝明皇帝。不許。詔曰。適者干戈相尋。地弗而不甦。桑殞而弗蠶。衣食日耗。送其閔之。民有嚮風來歸者。授之土田。仍給復三歲。二月乙亥。改太祖武皇帝廟號義祖。己卯。帝御興祥殿。復姓。爲考妣發哀。與皇后皆服斬纓。居廬。如始喪禮。服考妣喪各二十七日。凡五十四日不視朝。旦暮臨。詔國事委宋齊丘。惟軍旅以聞。羣臣固諫。詔以墨纓聽政。帝初欲更名昂。以犯文宗諱。乃各覓。或云朱金忠名也。又更名坦。御史王鵠言字從旦。犯睿宗諱。庚寅。詔更名昇。甲午。月犯南斗第六星。乙未。契丹使曷魯來。以兄禮事帝。蜀使來賀即位。追尊高祖建王恪曰定宗。孝靜皇帝貞妃程氏曰貞靜皇后。曾祖超曰成宗。孝平王配崔氏曰平貞妃。祖志曰惠宗。孝安王配盧氏曰安莊妃。考榮曰慶宗。孝德皇帝配劉氏曰德恭皇后。庚午。作南郊行宮千間。夏四月庚辰。朝享於太廟。辛巳。有事於南郊。以高祖神堯皇帝配。用上辛也。大赦。百官進位。將士勞賜有差。民三年藝桑及三千本者。賜帛五十疋。每丁墾田及八十畝者。賜錢二萬。皆五年勿收租稅。詔曰。朕以眇躬。託於民上。常懼弗類。以羞高祖太宗之遺業。羣公卿士。願欲奉上尊號之禮。朕甚不取。其勿復以聞。戊子。進封李德誠趙王。徐知證韓王。知諱梁王。辛亥。進封景遂齊王。景達宣城王。丙寅。以齊王璟爲諸道兵馬大元帥。丁未。吳越王使左武衛上將軍沈綽文。荆南高從誨使王崇嗣來賀南郊。作北郊於玄武湖西。熒惑犯月。秋七月丙午。放諸州所獻珍禽奇獸於鍾山。命有司作昇元格。與吳令並行。甲寅。歲星晝見。自五月不雨。至於閏七月。冬十月丁丑。御後樓。閱戰馬。昇元四年春二月。詔罷營造力役。毋妨農時。三月丁未。頒中正曆。曆官陳承勛所撰也。丙戌。漢人闕人來聘。夏五月。晉安州節度副使李金全來降。六月癸亥。罷宣州歲貢木瓜雜果。太師中書令趙王李德誠卒。秋八月。立齊王璟爲皇太子。仍兼大元帥。錄尚書事。璟固讓。從之。丁卯。月掩歲星。九月戊辰。契丹使梅里掠姑米里來聘。獻狐白裘。冬十月癸巳朔日。熒惑填歲星。聚於南斗。壬寅。以齊王璟讓儲貳。赦殊死以下。京師賜酺。內外諸軍給優賜。禁

表奏言聖睿二字。違者以大不敬論。乙巳。詔幸東都。命齊王璟監國。庚戌。帝自保德門御舟。辛亥。次迎鑾鏡。甲寅。至東都。入建元門。帝感念疇昔。恻然流涕不已。遣使問東畿士民不能自存者。己未。高麗使廣評侍郎柳兢質來貢方物。十一月乙丑。宣羣臣於崇德宮。故第也。以聽事爲光慶殿。庚辰。改東都文明殿爲乾元殿。英武殿爲明光殿。應乾殿爲垂拱殿。朝陽殿爲福昌殿。積慶宮爲崇道宮。西都崇英殿爲延英殿。凝華內殿前爲昇元殿。後爲雍和殿。興祥殿爲昭德殿。積慶殿爲穆清殿。乙酉。賜東畿高年疾苦俸獨米。人二石。漢使都官郎中鄭翔。閩使客省使葛裕。吳越使刑部尚書楊巖。來賀仁壽節。十二月丙申。帝至自東都。

昇元五年春二月己未。殺秦州刺史褚仁規。五月戊辰。契丹使來。秋七月。詔曰。右僕射兼中書侍郎同平章事監脩國史李建勳。幸處台司。且聯戚里。靡循紀律。敢隳彝章。其罷歸私第。八月。有星孛於天市。長數尺。七十日沒。遣使振貸黃州旱傷戶口。是歲。吳越水民就食境內。遣使振恤安集之。

昇元六年春正月甲子。月犯填星。退行在畢。閏月甲申朔。改天長制。置使爲建武軍。庚寅。漢使區延保來聘。癸巳。閩使尙食使林弘嗣來聘。都下大水。秦淮溢。東都火。焚數千家。二月己丑。以左丞相太保宋齊丘知尙書省事。初。齊丘累求預政。帝許中書視事。又以兩省事多委給事舍人。劇務多在尙書省。又求知省事。許之。夏五月。左丞相太保宋齊丘罷爲鎮南軍節度使。六月。常宣。歙三州大雨。漲溢。漢使蕭規來告哀。廢朝三日。庚午。契丹使掠姑米里來聘。獻馬五駒。大螭自淮北蔽空而至。辛未。命州縣捕蝗。燧之。庚辰。發惡犯房次終。守已。禁節度刺史給攝署職。秋八月甲申。漢使法物使公孫惠來謝襲位。九月庚寅。頒昇元削定條。冬十月。詔曰。前朝失御。四方崛起者衆。武人用事。德化壅而不宣。朕甚悼焉。三事大夫。其爲朕舉用儒者。罷去苛政。與吾民更始。十二月。閩使徐弘績。漢使滕紹英。吳越使右武衛大將軍蔣璠。來賀仁壽節。

昇元七年春正月。契丹使遼羅千等二十七人來聘。獻馬三百。羊三萬五千。二月庚午。帝別於昇元殿。年五十六。十一月壬寅。葬永陵。帝臨崩。謂齊王璟曰。德昌宮儲戒器金帛七百萬。汝守成謹。宜善及鄰國。以保社稷。吾服金石欲延年。反以速死。汝宜視以爲戒。帝生長兵間。知民厭亂。在位七年。兵不妄動。境內賴以休息。性節儉。常蹕蒲履。用鐵盆盥。暑月。纔殿施青葛帳。左右官婢裁數人。服飾樸陋。建國始。卽金陵。始卽爲宮。惟加鷁尾。設闌檻而已。

終不改作。元宗爲太子。欲得杉木作板障。有司以聞。帝曰。杉木固有之。但欲作戰艦。以竹作障可也。江淮間連年豐樂。兵食盈溢。羣臣多請恢拓境土。帝歎息曰。吾少在軍旅。見兵之爲民害深矣。誠不忍復言。使彼民安。吾民亦安矣。吳越國大火。焚其宮室帑藏。兵甲幾盡。將帥皆言乘其弊可以得志。帝一切不聽。遣使厚持金幣。唁之。仁厚恭儉。務在養民。有古賢主之風焉。

論曰。昔馬元康。胡恢。皆嘗作南唐書。自烈祖以下。元康謂之書。恢謂之載記。蘇丞相頌得恢書而非之曰。夫所謂紀者。蓋摘其事之綱要。繫於歲月。屬於時君。秦莊襄王而上。與項羽。皆未嘗有天下。而史遷著於本紀。范曄漢書。又有皇后紀。以是質之。言紀者不足。以別正閭陳壽三國志。吳蜀不稱紀。是又非可法者也。蘇丞相之言。天下之公言也。今取之。自烈祖而下。皆爲紀。而用史遷法。總謂之南唐紀云。

卷二

元宗本紀第二

元宗明道崇德文宣孝皇帝名璟。字伯玉。烈祖長子。母曰宋皇后。初名景通。風度高秀。幼工屬文。起家爲郢郎中。累進諸衛大將軍。烈祖爲齊王。立爲王太子。固讓。昇元初。烈祖受禪。封吳王。徙齊王。四年八月。立爲皇太子。復固讓曰。前世以嫡庶不明。故早建元良。示之定分。如臣兄弟友愛。尚何待此。烈祖爲下詔稱其守廉退之風。師忠貞之節。有子如此。予復何憂。赦殊死以下。臣民奉觴齊王。如太子禮。七年二月。烈祖病疽。秘之人皆莫知。庚午疾亟。大醫吳廷紹密遣人告帝。帝馳入宮。侍疾於東閣。是夕烈祖崩。秘不發喪。而下詔命帝監國。大赦。頒寶有差。丙子始宣遺詔。

保大元年。春三月己卯朔。烈祖殂已旬日。帝猶未嗣位。方泣讓諸弟。奉化節度使周宗。手取衮冕衣。帝曰。大行付陛下神器之重。豈得固守小節。是日卽皇帝位。大赦。改元。不待逾年。遽改元。識者非之。百官進位二等。將士皆有賜。蠲民逋負租稅。賜鰥寡孤獨粟帛。尊皇后爲皇太后。立妃鍾氏爲皇后。以鎮南軍節度使宋齊丘爲太保。兼中書令。奉化軍節度使周宗爲侍中。徙封壽王景遂爲燕王。宣城王景達爲鄂王。閩使來吊祭。升贛州爲定遠軍。秋。

七月。徙燕王景遂爲齊王。鄂王景達爲燕王。仍以景遂爲諸道兵馬元帥。居東宮。景達爲副元帥。仍詔中外以兄弟傳國之意。八月乙卯。立弟景揚爲保寧王。冬十月庚戌。有星孛於東方。嶺南妖賊張遇賢犯虔州。詔遣洪州營屯都虞候嚴恩帥師討之。以通事舍人邊鎬監其軍。其後擒遇賢及其黨黃伯雄。曹景全斬於金陵市。十二月。以太保中書令宋齊丘爲鎮海軍節度使。

保大二年春正月。侍中周宗。罷爲鎮南軍節度使。左僕射兼門下侍郎平章事張居誨。罷爲鎮海軍節度使。辛巳。詔齊王景遂總庶政。惟樞密副使魏岑。查文徽得奏事。餘非召對不得見。初。烈祖尤愛景遂。帝奉先志。欲傳以位。故有是詔。宋齊丘。蕭儼皆上書切諫。未見聽。侍衛都虞候賈崇叩閣請見曰。臣事先帝三十年。孜孜詢察。下情猶患壅隔。陛下始即位。所委何人。而頓與臣下疎絕。如此。因鳴咽流涕。帝感悟。命坐賜食。遂收所上詔。夏五月。閩將朱文進弑其君曦。自稱閩王。遣使來告。帝囚其使。將討之。議者謂閩亂由王延政。當先討。乃釋閩使遣還。秋九月。庚午朔。日有食之。冬十二月。樞密院使查文徽請討王延政。詔以文徽爲江西安撫使。往覘建州。文徽固請。乃以邊鎬爲行營招討。共攻延政。敗績於蓋竹。

保大三年春二月。以何徽誅爲福建道行營招討。祖全恩爲應援使。姚鳳爲諸軍都監。會查文徽進討。秋七月。星見而風雨。八月甲子朔。日有食之。克建州。執王延政歸於金陵。拜羽林大將軍。升建州爲永安軍。冬十月。皇太后宋氏殂。是歲升建州延平津爲劍州。以建州之劍浦。汀州之沙縣隸焉。

保大四年春正月。以青陽公宋齊丘爲太傅兼中書令。昭武軍節度使李建勳爲右僕射兼門下侍郎。及中書侍郎。薦延己皆平章事。夏五月。以樞密使陳覺爲福建宣諭使。使諭李弘義入朝。不克。覺擅發汀建撫信州兵趨福州。帝遂命王崇文。魏岑。馮延魯會攻福州。秋九月。淮南蟲食稼。除民田稅。冬十月庚辰。圍福州。政彥州爲南州。保大五年春正月。立齊王景遂爲皇大弟。徙燕王景達爲齊王。拜諸道兵馬元帥。徙南昌王弘冀爲燕王。副元帥。晉密州刺史皇甫暉。棣州刺史王建來歸。契丹耶律德光以賊晉來告捷。且請會盟於境上。帝不從。遣工部郎中張易聘之。請命使者如長安脩奉諸陵。契丹亦不從。三月己亥。吳越救福州。兵自海道至。我師與之戰。敗績。諸營皆潰。夏四月壬申。詔即軍中斬陳覺。馮延魯。餘將帥皆赦不問。已而復詔械覺延魯還都。既至。貸死。覺流蘄州。延

魯流舒州。五月。帝聞契丹棄中原。還歸。詔曰。乃管中原。我之故地。以李金全爲北面行營招討使。六月。闕漢入汴。兵遂不出。而金全猶不罷。秋。閏七月丁丑。夜有彗出東方。近濁。其尾迹近側。掃少微及長垣。至八月壬辰。乃沒。八月。太傅兼中書令宋齊丘罷爲鎮南軍節度使。

保大六年。夏六月庚寅朔。日有食之。九月。漢護國軍節度使李守貞。間道表求援師。以鎮海軍節度使李金全爲北面行營招討使。救河中。師次沂州。冬十一月。退保海州。

保大七年。春正月。淮北盜起。以神衛都虞候皇甫暉。將軍張巒。蕭處賢。監軍散騎常侍張義方。帥師萬人。出海州。招降。納亳州蒙城鎮。將咸師朗等。以歸。夏六月癸酉朔。日有食之。冬十月。我師度淮。攻正陽。敗績。十二月。泉州刺史劉從効。兄南州刺史從願。殺刺史董思安。據南州。自稱刺史。我不能問。因升泉州爲清源軍。以從効爲節度使。保大八年。春正月。李金全始罷北面行營招討使。二月。福州遣諜者詣建州。留後查文徽。告吳越戍卒亂。殺李弘義。棄城去。文徽信其言。襲福州。大敗。被執。而別將建州刺史陳誨。以戰棹敗福州兵。執其將馬先進。俘於金陵。秋七月。歸馬先進於吳越。而求查文徽。八月。尙書郎周濬等三人奔漢。九月。楚朗州節度使馬希萼表請師。詔加同平章事。賜以鄆州今年租稅。命楚州團練使何敬洙帥師援之。冬十月。趙歸查文徽。十一月甲子朔。日有食之。十二月。馬希萼攻陷潭州。弑其君馬希廣。楚將李彥溫。劉彥瑫。各以千人來歸。

保大九年。春二月。楚王希萼使掌書記劉光翰來貢方物。三月壬戌朔。以右僕射孫晟。客省使姚鳳。爲楚王策禮使。又以洪州營屯都虞候邊鐫爲湖南安撫使。便宜進封。淮南饑。夏五月辛未。有星大如五升器。自西北流墜西南。光燭地。聲如雷。六月。楚靜江軍指揮使王遠。執朗州節度使馬光惠。歸於金陵。推辰州刺史劉言爲朗州留後。來請命。秋九月。楚將徐威等。廢其君希萼。命邊鐫出萍鄉。以討楚亂。冬十月壬寅。武安留後馬希崇請降。鐫入潭州。癸丑。武昌節度使劉仁贍。帥舟師取岳州。湖南遂平。南漢來攻。陷郴州。周兗州節度使慕容彥超來乞援師。從之。

保大十年。春正月。陞洪州高安縣爲筠州。以清江萬載。上高三縣隸焉。援兗州之師。敗績於沐陽。周人執我指揮使燕敬權。二月。周人歸敬權。使來言曰。吾賊臣背叛。爾國助之。豈長計哉。且使潁州郭瓊還我壽州。劉彥貞書曰。

自古有國。皆惡叛臣。貴邦何爲。常事招誘。吳中多士。無乃殘圖。帝頗愧其言。以翰林學士江文蔚知禮部貢舉。放進士王克貞等三人及第。旋復停貢舉。三月。以太弟太保馮延巳爲左僕射。前鎮海節度使徐景翼爲中書侍郎。及右僕射孫忌。並同平章事。帝以南漢梁楚亂。據桂宜等州。將取之。以知全州張繼兼桂州招討使。夏四月丙戌朔。日有食之。命統軍侯訓帥五千人。會張繼攻桂州。敗績於城下。訓死之。繼收餘衆保全州。周興順指揮使白進福以族來歸。秋九月。召朗州劉言入朝。冬十月。劉言將王遠周行逢攻潭州。王辰拔益陽寨。戍將李建期死之。丙申。潭州節度使邊鎬棄城遁。辛丑。劉言將蒲公益攻岳州。刺史宋德權監軍任鎬棄城遁。十一月。劉言盡據故楚地。詔流邊鎬於饒州。斬宋德權。任鎬於太社。斬裨將申洪泰。尹建於都門外。平章事馮延巳孫忌。皆罷爲左右僕射。十二月。零都令趙遷奔周。洪州大都督楚王馬希萼來朝。留不遣。是歲大旱。

保大十一年。春三月。以左僕射馮延巳同平章事。金陵火。逾月。焚官寺民廬數千間。復設貢舉。夏六月不雨。井泉竭。淮流可涉。旱蝗民饑。流入周境。冬十月。築楚州白水塘。以溉屯田。遂韶州縣陂塘湮廢者。皆脩復之。於是力役暴興。楚州常州爲甚。帝使親吏車延規董其役。發供饒吉筠州民牛以往。吏緣爲姦。強奪民田爲屯田。江淮騷然。百姓以數丈竹去節焚香於中。仰天訴冤者。不可勝數。知制誥徐鉉。因奏事白之。帝曰。吾國兵數十萬。安肯不食掉邊。事有大利。則舉國排之。奈何。鉉又力陳其弊。帝乃遣鉉行視利害。鉉至楚州。悉取所奪田還民。詰責車延規。欲榜之。百姓感悅。而帝左右交譖。以爲擅作威福。帝大怒。趣歸。將沉之江中。既至。怒少解。流舒州。而白水塘等役。亦賴以止。

保大十二年。春正月。有大星貫於西北。聲如雷。二月。命吏部侍郎朱鞏知禮部貢舉。自十一年六月。至於今年三月。大饑疫。命州縣鬻粥食餓者。秋七月。契丹使其舅來聘。夜宴清風驛。盜斬契丹使。亡去。捕之不得。或以爲周人也。自是契丹遂不至。

保大十三年。春二月。以中書侍郎知尚書省嚴續爲門下侍郎平章事。夏六月。周攻秦鳳。蜀使間使來告難。周下詔罪狀我。遣將李穀。王彥超。韓令坤等侵我淮南。攻自壽州。帝乃以神武統軍劉彥貞爲北面行營都部署。帥師三萬赴壽州。奉化節度使同平章事皇甫暉爲北面行營應援使。常州團練使姚鳳爲應援都監。帥師三萬屯定

遠縣召鎮南節度使宋齊丘入朝謀難。冬十二月，以安定郡公從嘉孫范仁巡撫使。是歲天裂東北，其長二十丈，保大十四年。春正月壬寅，周帝親征，劉彥貞與周師戰於正陽，敗績。彥貞戰死。二月，周師兼道襲清流關，皇甫暉敗保谿州。周師破城，俘暉及姚鳳以歸。壬戌，有星孛於參芒。東南指，帝遣泗州牙將王承朗奉書至徐州，求成於周。稱唐皇帝奉書於大周皇帝，願以兄事。歲獻方物。大弟景遂亦移書周將帥，皆不報。己卯，遣翰林學士鍾謨文選院學士李德明使周奉表。至下蔡，行在，黃金器千兩，銀器五千兩，錦綺紋帛二千疋，及御衣犀帶茶藥。又奉牛五百頭，酒二千石，犒軍，請罷兵。乙酉，周師陷東都，執副留守葛延魯。丁亥，左神衛使徐象等十八人，自壽州奔周。天長制置使耿謙以城降於周。遣園苑使尹廷範護還讓皇之族於潤州。廷範殺其男子六十人，誅廷範以謝國人。周師陷泰州，刺史方訪棄城遁。帝遣閭使求援於契丹。至浩北，爲周人所執。吳越侵常州宣州，靜海制置使姚彥洪奔吳越。三月，遣司空孫晟及禮部尚書王崇質使周，削去帝號，奉表請爲外臣。猶不許。光州兵馬都監張延翰以城降於周。刺史張紹遜遁。丁酉，周師陷舒州，刺史周弘祚赴水死。蘄州將李程殺知州王承舊，降於周。戊戌，天成軍使蔡暉自壽州奔周。周師陷和州，詔斬李德明於都市，坐奉使請割地也。吳越陷常州之郭，執團練使趙仁澤。燕王弘冀遣龍武都虞候柴克宏救常州。王子大敗吳越兵於常州。斬獲萬計，俘其將數十。至潤州，弘冀悉斷之。壬戌，壽州軍校陳延貞等十三人奔周。是月，命諸道兵馬元帥齊王景達拒周。夏四月，復泰州。五月，周帝北還。秋七月，復東都舒蘄光，和滁州。惟壽州之圍愈急。冬十月，周人害我行人孫晟，從者二百人皆死。獨貨鍾謨，以爲耀州司馬。是歲詔省法南屯田之害民者。

保大十五年。春二月乙亥，周帝親征。齊王景達自濠州遣邊錡許文稹。朱元帥兵數萬援壽州。景達用監軍使陳覺言，謀募朱元兵以楊守忠代之。元遂舉寨降周。裨將時厚卿獨不從，見殺。壬辰，周師盡破我諸寨，執邊錡許文稹。楊守忠餘衆悉奔濠。景達亦還歸金陵。是役也，所喪四萬人。三月，誅朱元妻子。丁未，壽州劉仁贍病革，副使孫羽等代仁贍署表降於周。辛亥，晝晦，雨沙如霧。夏四月，周帝北還。冬十一月，周帝復親征。十二月，濠州刺史郭廷謂、泗州刺史范再遇皆舉城降。帝知東都必不守，遣使焚其官私廬舍，徙其民於江南。周師入揚州。丁丑，周師攻陷泰州。都城大火，一日數發。

交泰元年春正月。政元中興。丙戌。周師陷海州。壬辰。周師陷靜海軍。丁未。陷楚州。防禦使張彥卿。兵馬都監鄭昭業。死之。周師屠其城。焚廬舍殆盡。周師次雄州。刺史易文贊舉城降。州天長縣也。三月。大赦。政元交泰。以皇太弟景遂爲天策上將軍。晉王立燕王弘冀爲皇太子。參治朝政。丁亥。周帝次揚州。辛卯。遂至迎鑾驛。壬辰。耀兵江口。帝懼。周師南渡。遣樞密使陳覺奉表貢方物。請傳位太子弘冀。以國爲附庸。周帝始采唐報回紇。可汗故事。答帝璽書。稱皇帝致書敬問江南國主。帝遣閣門承旨劉承遇上表。稱唐國主。盡獻江北郡縣之未陷者。鄂州漢陽沙川二縣在江北。亦獻焉。歲輸土貢數十萬。乞海陵鹽監南屬。不許。後歲給贍軍鹽三十萬石。庚子。周帝賜書。許帝奉正朔。罷兵。而不許傳位太子。甲辰。遣平章事馮延巳等使周犒軍。及夏五月。下令去帝號。稱國主。去交泰年號。稱顯德五年。置進奏邸於汴都。凡帝者儀制。皆從貶損。改名景。以避周信祖諱。告於太廟。告廟之日。金陵大霧。通夕不解。左僕射平章事馮延巳。罷爲太子太傅。門下侍郎平章事嚴續。罷爲太子少傅。己酉。周帝遣太府卿馮延魯。衛尉少卿鍾謨。賜國主御衣金玉帶錦帛半馬。及犒軍帛十萬。凡士卒俘於周者。皆遣還。凡五千七百五十人。冬十月甲午。周帝歸我臣馮延魯。許文稹。邊鏞。周廷構。國主皆不復用。十一月己亥。暴宋齊丘。陳覺。李徵古。罪。放齊丘歸九華山。覺安置饒州。徵古削官爵。覺徵古尋皆賜自盡。齊丘明年正月。亦幽死。

顯德六年。秋七月。鑄大錢。文曰永通泉貨。一當十。與舊錢並行。又鑄唐國通寶錢。二當開元錢之二。九月丙午。太子弘冀卒。冬十一月。建洪州爲南都。南昌府。

建隆元年。春正月。遣何荏誅鍾謨於饒州。誅張鑒於宣州。大宋太祖皇帝受周禪。放江南降將三十四人來歸。二月。始鑄鐵錢。三月。遣使朝賀於京師。秋七月。遣禮部郎中龔慎儀朝於京師。貢乘輿服御。自是貢獻尤數。歲費以萬計。冬十月。宋楊州節度使李重進叛。來求援。不許。十一月丁未。太祖平李重進。國主遣右僕射嚴續犒軍。蔣國公從鎰。戶部侍郎馮延魯朝貢。

建隆二年。春二月。國主遷於南都。立吳王從嘉爲太子。留金陵監國。國主舟行。旌麾仗衛。大軍百司。凡千餘里。不絕。所過勞問。高年疾苦。大宴於當塗。至宋家林。暴風飄國主舟。幾至北岸。翼日。從官皆乘輕舟奔問。三月。國主至南都。太祖以國主遷都。遣通事舍人王守真來勞問。南都迫隘。羣下皆思歸。國主亦悔遷。北望金陵。鬱鬱不樂。澄

心堂承旨秦承裕常引屏風障之。復轡東遷。未及行。國主寢疾。不復進膳。惟啖蔗漿。嗅藕華。六月己未。疾革。親書遺令。留葬西山。累土數尺爲墳。且曰。違吾言。非忠臣孝子。夕有大星。竄於南都。庚申。殂於長春殿。年四十六。後主不忍從遺令。迎喪還。秋八月。至金陵。丁未。殯於宮中萬壽殿。告哀於京師。且請追復帝號。太祖許之。

三年正月戊寅。葬順陵。元宗多才藝。好讀書。便騎善射。在位幾二十年。慈仁恭儉。禮賢睦族。愛民字孤。裕然有人君之度。少喜栖隱。築館於廬山。瀑布前。蓋將終焉。迫於紹襲而止。然自以唐室苗裔。詭於斥大境土之說。及福州湖南再喪師。知攻取之難。始議弭兵務農。或曰。願陛下十數年勿復用兵。元宗曰。兵可終身不用。何十數年之有。會周師大舉。寄任多非其人。折北不支。至於蹙國降號。憂悔而殂。悲夫。

論曰。元宗舉閩楚之師。境內虛耗。及契丹滅晉。中原有隙可乘。而南唐兵力。國用既已弗支。熟視而不能出。世以爲恨。予謂不然。唐有江淮。比同時割據諸國。地大力強。人材衆多。且據長江之險。薄然大邦也。若用得其人。乘閩楚昏亂。一舉而平之。然後東取吳越。南下五嶺。成南北之勢。中原雖欲睥睨。豈易動哉。不幸諸將失律。貪功輕舉。大事弗成。國勢遂弱。非始謀之失。所以行之者非也。且陳覺馮延魯輩用師閩楚。猶喪敗若此。若北鄉而爭天下。與秦晉趙魏之師戰於中原。角一旦勝負。其禍可勝言哉。故予具論其實如此。後之覽者。得以考觀焉。

卷二

後主本紀第三

後主名煜。字重光。元宗第六子。初名從嘉。母曰光穆皇后鍾氏。從嘉廣額豐頰。駢齒。一目重瞳子。文獻太子惡其有奇表。從嘉避禍。惟覃思經籍。歷封安定郡公。鄧王。文獻太子卒。徙吳王。以尙書令知政事。居東宮。建隆二年。遂立爲太子。元宗南巡。太子留金陵監國。以嚴續殷崇義輔之。張洎主機奏。六月。元宗殂。太子嗣立於金陵。更名煜。居喪哀毀幾不勝。赦境內。尊鍾后曰聖母后。以后父各名太章也。立妃周氏爲國后。徙信王景揚爲江王。鄧王從善爲韓王。立弟從鎰爲鄧王。從謙爲宜春王。從信爲文陽郡公。從度爲昭平郡公。從虔。景遷子也。令諸司四品至九品無職事者。日二員待制於內殿。以右僕射嚴續爲司空平章事。餘進位有差。遣中書侍郎馮延壽於京師。奉表

陳襲位。太祖賜詔答之。言是始降詔。秋九月。太祖遣教習庫使梁義來吊祭。冬十月。太祖遣樞密承旨王文來賀襲位。初。元宗雖臣於周。惟去帝號。他猶用王者禮。至是國主始易紫袍。見使者。使退。如初服。十二月。置龍翔軍以教水戰。

建隆三年。春三月。遣馮延魯入貢京師。泉州節度使中書令晉江王劉從効卒。子紹鑑自稱留後。四月。泉州將陳洪進。執紹鑑歸金陵。推副使張漢思爲留後。六月。遣客省使翟如璧入貢京師。太祖放降卒千人南還。冬十一月。遣水部郎中顧彝入貢京師。

乾德元年。春正月。太祖遣使來。賜羊馬囊馳。三月。太祖出師平荆湖。國主遣使犒軍。夏四月。泉州副使陳洪進廢張漢思。自稱權知軍府。來告國主。即以洪進爲節度使。秋七月。太祖詔國主。遣還顯德以來中朝將士在江南者。及令揚州民遷江南者。還其故土。十二月。國主表乞罷詔書不名之禮。不從。

乾德二年。春三月。行鐵錢。每十錢。以鐵錢六。權銅錢四而行。其後銅錢遂廢。民間止用鐵錢。末年。銅錢一直鐵錢十。比國亡。諸郡所積銅錢六十七萬。命吏部侍郎脩國史韓熙載知貢舉。放進士王崇古等九人。國主命中書舍人徐鉉。覆試舒雅等五人。雅等不就。國主乃自命詩賦題。以中書官蒞其事。五人皆見黜。秋八月。太祖於江北置折博務。禁商旅過江。九月。立子仲寓爲清源郡公。仲宜宣城郡公。十月甲辰。仲寓卒。國后周氏已寢疾。哀傷增革。遂亦卒。十一月。太祖遣作坊副使魏丕來吊祭。

乾德三年。夏五月。司空平章事嚴續罷。爲鎮海軍節度使。秋九月。南紗。聖尊后鍾氏歿。冬十月。太祖遣染院使李光圖來吊祭。

乾德四年。秋八月。國主遣襲懷儀持書使南漢。約與俱事中朝。九月。懷儀至番禺。被執。

乾德五年。春。命兩省侍郎。諫議給事中。中書舍人。集賢勤政殿學士。更直光政殿。召對咨訪。率至夜分。

開寶元年。春三月。戊申。以樞密使右僕射殷崇義爲左僕射。同平章事。境內旱。太祖賜米麥十萬石。冬十一月。立國后周氏。

開寶二年。三月。以游簡言爲左僕射。兼門下侍郎。同平章事。夏五月。簡言卒。是歲右僕射同平章事殷崇義罷。爲

潤州節度使同平章事。

開寶三年夏。太白晝見。二日相觸。

開寶四年。冬十月。國主聞太祖城南漢。屯兵於漢陽。大懼。遣太尉中書令鄭王從善朝貢。稱江南國主。請罷詔書。不名從之。有商人來告。中朝造戰艦數千艘。在荆南。請密往焚之。國主懼。不敢從。

開寶五年。春二月。國主下令貶損儀制。改詔爲教。中書門下省爲左右內史府。尚書省爲司會府。御史臺爲司憲府。翰林院爲文館。樞密院爲光政院。大理寺爲詳刑院。客省爲延賓院。官號亦從改易。以避中朝。初金陵殿閣皆毀。賜吻。元宗雖臣於周。猶如故。乾德後。遇中朝使至。則去之。使還復設。至是。遂去不復用。降諸弟封王者皆爲公。從善楚國。從鎰江國。從謙鄂國。內史舍人張佖知禮部貢舉。放進士楊遂等三人。清耀殿學士張洎言似多遺才。國主命洎考覈。遺不中第者。於是又放王倫等五人。閏月癸巳。太祖命進奉使趙國公從善爲泰寧軍節度使。留京師。賜第汴陽坊。示欲召國主入朝也。國主遣戶部尚書馮延魯。謝從善爵命。延魯至京師。疾病。不能朝而歸。開寶六年。夏。太祖遣翰林院學士盧多遜來。國主聞太祖欲興師。上表類受爵命。不許。以司空殷崇義知左右內史事。冬十月。內史舍人潘佑。上書切諫。佑素與戶部侍郎李平交厚。國主以爲事皆由平始。先以平屬吏遣使收佑。佑自殺。平縊死獄中。皆徙其家外郡。

甲戌歲秋。國主上表求從善歸國。不許。太祖遣閤門使梁迥來。使從容言曰。天子今冬行柴燎之禮。國主宜往助祭。國主不答。九月丁卯。復遣知制誥李穆爲國信使。持詔來曰。朕將以仲冬有事園丘。思與卿同閤犧牲。且諭以將出師。宜早入朝之意。國主辭以疾。且曰。臣事大朝。翼全宗祀。不意如是。今有死而已。時太祖已遣潁州團練使曹翰。率師先出江陵。宣徽南院使曹彬。侍衛馬軍都虞候李漢瓊。賓州刺史田欽宰。率舟師繼發。及是又命山南東道節度使潘美。侍衛步軍都虞候劉遇東。上閤門使梁迥。率師水陸並進。與國信使李穆同日行。冬十月。國主遣江國公從鎰。貢帛二十萬疋。白金二十萬斤。又遣起居舍人潘慎修。貢買宴帛萬疋。錢五百萬。築城聚糧。大爲守備。閏十月。王師拔池州。國主於是下令戒嚴。去開寶紀年。稱甲戌歲。辛未。王師進拔蕪湖。及雄遠軍。吳越亦大舉兵犯常潤。國主遣吳越王書曰。今日無我。明日豈有君。一旦明天子易地賞功。王亦大梁一布衣耳。吳越王表

其書於朝。王師次采石磯。作浮橋成。長驅渡江。遂至金陵。每歲大江春夏暴漲。謂之黃花水。及王師至。而水皆縮。小國入異之。國主以軍旅委皇。百繼勳。機事委陳喬張洎。又以徐元瑀。刁衍。幕內殿傳詔。而遽書警奏。日夜狎至。元瑀等輒屏不以聞。王師屯城南十里。閉門守陴。國主猶不知也。初烈祖有國。凡民產二千以上。出一卒。號義軍。分籍者又出一卒。號生軍。新置產亦出一卒。號新擬軍。客戶有三丁者。出一卒。號拔山軍。元宗時。許都縣村社競渡。每歲重午日。官閱試之。勝者。給綵帛銀棹。皆籍姓名。至是盡取爲卒。號凌波軍。民奴及贅婿。號義勇軍。募豪民以私財招聚亡賴亡命。號自在軍。至是又大蒐境內。自老弱外。皆募爲卒。號排門軍。民間又有自相率拒敵。以紙爲甲。農器爲兵器。號白甲軍。凡十三等。皆使捍禦。然實皆不可用。奔潰相踵。

乙亥歲。春二月壬戌。王師拔金陵關城。三月丁巳。吳越攻我常州。權知州事禹誠以城降。誅神衛都指揮使皇甫繼勳。聲出五車。色白。長五尺。夏六月。轉見西方。犯太微。六十日滅。王師及吳越圍潤州。留後劉澄以城降。吳越遂會王師圍金陵。洪州節度使朱令贄。帥勝兵十五萬赴難。旌旗戰艦甚盛。編木爲棧。長百餘丈。大艦容千人。令贄所乘艦尤大。擁甲士。建大將旗鼓。將斷采石浮橋。至皖口。與王師遇。傾火泊焚北船。適北風反。焰自焚。我軍大潰。令贄及戰艦都虞候王暉。皆被執。外援既絕。金陵益危蹙。王師百道攻城。晝夜不休。城中米斗萬錢。人病足弱。死者相枕藉。國主兩遣徐鉉等厚賈方物。求緩兵。守祭祀。皆不報。冬十一月。白虹貫日。晝晦。乙未城陷。將軍馮彥馬承信。及弟承俊。帥壯士數百。力戰而死。勤政殿學士鍾禧。朝服坐於家。亂兵至。舉族就死不去。光政使右內史侍郎陳喬。請死不許。自縊死。國主帥司空知左右內史事殷崇義等。肉袒降於軍門。明年正月辛未。至京師。乙亥。授右千牛衛上將軍。封違命侯。太宗即位。加特進。改封諸葛公。太平興國三年。七月辛卯。殂。年四十二。是日七夕也。後主蓋以是日生。贈太師。追封吳王。葬洛陽北邙山。後主天資純孝。事元宗盡子道。居喪哀毀。杖而後起。嗣位之初。屬保太軍。與之後國削勢弱。帑庫空竭。專以愛民爲急。蠲賦息役。以裕民力。尊事中原。不憚卑屈。境內賴以少安者十有五年。憲司章疏。有繩糾過許。皆寢不下。輪決死刑。多從末減。有司固爭。乃得少正。猶垂泣而後許之。常獵於青山。還如大理寺親錄繫囚。多所原釋。中書侍郎韓熙載奏。獄訟有司之事。園囿非車駕所宜臨幸。請罰內庫錢三百萬以資國用。雖不聽。亦不怒也。殂。問至江南。父老有巷哭者。然酷好浮屠。崇塔廟。度僧尼。不可勝算。